

Dithero tsa Tirelano mo Kutlwanong

42/2013 Thero ka Sontaga wa 12 morago ga moletlo wa Borarobongwe/Trinitate, e le ka 18. 08. 2013

MO LEINENG LA MODIMO O E LENG RARA LE MORWA LE MOWA O O BOITSHEPO!

1. Sefela sa 21 - 21/ -
2. **Thapelo:** Rraetsho yo o mo legodimong, re lebogela phatlha eno e e molemo ya go utlwa Lefoko la gago, re kopa Mowa o o Boitshepo gore o re goge, o re tsoseletse ka Lefoko la gago gore re tlabologe, re nne bana ba ba ikanyegileng ba gago, re rate Lefoko la gago, re le utlwe, re le ithute ka boitumelo. Re kopa jalo mo leineng la ga Morwao Jesu Keresete. Amen.
3. Epistolo ka fa thulaganyong ya 2 e kwadilwe mo Ditirong tsa baapostolo 9:1-20;
Efangele ka fa thulaganyong ya 1 e kwadilwe mo go Mareko 7:31-37.
4. A go ipolelwe tumelo ya bokeresete!
5. Sefela sa 20 - 20/ -
6. Thapelo ya mmadi wa thero.
7. **Efangele** ka fa thulaganyong ya 5 e kwadilwe mo go Mareko 8:22-26, e re: "Jaanong ba fitlha mo Betsaida. Foo batho ba tsisa sefofu kwa go ene, ba mo rapela gore a se ame. A tshwara sefofu seatleng, a se gogela kwa ntle ga motsana, a se kgwela mathe mo matlhong, a se baya diatla, a se botsa a re: 'A o bona sengwe?' Sa lelala sa re: 'Ke bona batho; mme ke ba bona ba tsamaya, e kete ke ditlahre.' A boa a se baya diatla gape mo matlhong, sa ba sa leba thata, sa fodisiwa, sa bonela tsotlhe sentle kwa kgakala. Jaanong a se romela kwa ntlong ya sona a re: 'O se ka wa tsena mo motsaneng, le e seng go bolelela ope mo go ona.'" Amen.
8. **Thero:** Barategi mo Moreneng wa rona Jesu Keresete, a re lebeng mafoko otlhe a a lebaganang le Sontaga wa kajeno, re bone tlagare ya dikgang tsa Sontaga wa kajeno, re bone gore Morena wa rona o rata go re direla ka Lefoko la gagwe, o rata go re fodisa rona ba re leng balwetsi, o rata go re pholosa rona ba re leng baleofi gore re tshele le ene mo pusong ya gagwe go ya bosenangbokhutlo.

Temana ya beke e kwadilwe mo Efangeleng ya Matheo mo kgaolong ya lesome le bobedi, temana ke ya bomasome a le mabedi. Ke Lefoko le le setseng le kwadilwe ke moporofeti Jesaya mo kgaolong ya 42, le re: "Lotlhaka lo lo phitsegileng ga a kitla a lo roba, le mogala wa lobone o o takatakang ga a kitla a o time, go ya a be a neele tshiamo phenyo." Lefoko leo le rata go re ruta ka ga bopelotlhomogi jwa Modimo o o sa rateng go re latlha ka ntlha ya maleo, le e seng ka ntlha ya diphoso tsa rona, mme o rata go re tshwara ka bopelotlhomogi jwa ona. Rona ba re leng batho re tshwana le lotlhaka lo lo phitsegileng ka ntlha ya maleo a rona. Re tshwana le mogala wa lobone o o takatakang ka ntlha ya diphoso tsa rona, mme Modimo ga o re latlhe ka ntlha ya moo, mme o re direla ka bopelotlhomogi jo bogolo jwa ona, o a re tshegetsatsa, o a re itshwarela, o a re alafa gore re nne bana ba ba siameng ba gagwe.

Fa re ne re buisa Efangele ya kajeno (Mar. 7:31-37), re utlwile ka ga phodiso ya ga Jesu Keresete ya go fodisa motho wa sesusu yo o neng a gweletlha. Jesu Keresete o ne a tsenya menwana ya gagwe mo ditsebeng tsa gagwe, a kgwa mathe, a ama loleme lwa gagwe, a lelala kwa legodimong, a fegelwa, a kopa rraagwe, a raya motho wa sesusu, a re: Efatha! A mo fodisa jalo. Ke fa re utlwa gore ditsebe tsa gagwe tsa kabologa ka bonako, le thapo ya loleme lwa gagwe ya funologa, a ba a bua sentle. Jesu Keresete o alafa balwetsi, o pholosa baleofi.

Le Epistolo ya kajeno (izE. 9:1-20) e rata go re ruta ka kalafo ya Morena Jesu Keresete ya go alafa molwetsi yo o neng a sa bone Jesu Keresete ka matlho a gagwe, fa e le Mopholosi; Saulo o ne a tsoma phuthago ya ga Jesu Keresete, a batla go senya phuthago yotlhe, a gopola gore o dira tiro e e ratwang ke Modimo, mme Jesu Keresete Morena wa kereke a mo digela fa fatshe, a mmetsa gore a se ka a bona, a fofatsa matlho a gagwe, Saulo a fetoga go nna sefofu. Jesu Keresete a fofatsa matlho a ga Saulo gore a mo gogele mo tshabologong, a se ka a tswelela go tsoma phuthago, go bolaya kereke ya Morena wa rona, Jesu Keresete. A mmetsa ka lefifi gore a bone lesedi, a mo fofatsa gore a bone, a mo dira go nna sefofu gore a tshaloganye boammaaruri jwa Efangele ya ga Jesu Keresete. Ka go sa bone ga gagwe, o bonye lesedi la Efangele ya ga Jesu Keresete, Mopholosi wa lefatshe.

Le Lefoko la thero ya kajeno e rata go re bontsha bontle jwa ga Jesu Keresete, Mopholosi wa rona, ka go fodisa sefofu sele. Lefoko leo le re senolela thata ya ga Jesu Keresete. Jaaka Modimo Rraagwe Jesu Keresete o na le thata go fodisa balwetsi, go alafa batho ba ba lwalang. Ene ka nosi ke Motlhodi. O na le thata go re fa botshelo, o na le thata go re fodisa, o na le thata go re alafa. Lefoko leo, e bile le re bontsha se sengwe. Le a re bolelela gore Jesu Keresete a tshwara sefofu seo ka diatla, a mo gogela kwa ntle ga motse, a mo ntsha mo

bontsing, a mo isa fa thoko. Jesu o ne a sa rate go alafa sefofu seo fa pele ga batho, a sa rate go se alafa fa pele ga Bafarisai ba ba mo raetseng ka go batla sesupo mo go ene. Jesu o ne a dira tiro ya phodiso ya molwetsi yoo ka ntlha ya bopelotlhomogi jwa gagwe, ga a ka a fodisa sefofu seo ka ntlha ya go rata go natefela bale ba ba batlileng ditshupo mo go ene.

Bafarisai ba ne ba tla go Jesu go mo raela, le go mo leka ka go kopa sesupo mo go ene. Jesu a ba kgalemela, a ba botsa, a re: Lo na le matlho, mme a ga lo bone? Lo na le ditsebe. A ga lo utlwe? A re: A ga lo ise lo tlhaloganye? Motho ga a tlhoke matlho a a siameng, le e seng ditsebe tse di siameng gore a dumele. Difofu di a dumela, disusu le dimumu di a dumela, gonne Jesu Kereete o butse dipelo tsa tsona gore di dumele. Mme batho ba le bantsi ba ba nang le ditsebe tse di itekanetseng, le matlho a a itekanetseng ga ba dumele mo go ene, fa e le Mopholosi wa bone. Jesu o bolelela barutwa ba gagwe, a re: Lo filwe go itse masaitsiweng a puso ya Modimo, mme ba bangwe ba fiwa ka dithswantsho gore ba ntse ba bona ga ba bone, ba ntse ba utlwa, ba sa tlhaloganye. Lefoko leo le a re bontsha sentle gore ga re ka ke ra tlhaloganya tsa puso ya Modimo ka tlhaloganyo ya rona. Martin Luther o thalosa kang eo mo kgaolong ya bobedi ka Artikele ya boraro mo Kategisimeng, a re: "Ke dumela gore ga nka ke ka dumela mo go Jesu Keresete, Morena wa me, ka tlhaloganyo le thata ya me, le e seng go tla go ene ka tsona." Ga re ka ke ra dumela mo go Jesu Keresete ka thata ya rona ya tlhago. Ga re ka ke ra bona Jesu Keresete ka matlho a rona a tlhago. Ga re ka ke ra tlhaloganya Lefoko la ga Jesu Keresete ka go le utlwa ka ditsebe tsa tlhago fela. Mme fa Mowa o o Boitshepo o bula pelo, le go foufolola, le go budulola matlho, le go kabolola ditsebe, fa di angwa ke ona, re dumela mo go ene ka Efangele ya gagwe, re bona Jesu Keresete, re utlwa Lefoko la gagwe, re dumela mo go ene.

A re boneng bopelotlhomogi jo bogolo jwa gagwe. Re leboga Modimo yo o jwadileng tumelo mo dipelong tsa rona, a ama matlho, loleme, ditsebe tsa rona gore re o bone, re o utlwe, re o tlotle. A re lebogeng Mopholosi yo o siameng wa rona yo o re tsetseng sešwa, a re naya dipelo tse dintšhwa, a re naya ditsebe tse dintšhwa le matlho a mašwa, a re naya diteme tse dintšhwa. A re di diriseng mo botshelong jo bošwa jo bo laolwang ke Morena Jesu Keresete tota. Amen.

9. Thapelo: A re rapeleng, re leboge Modimo ka Pesalome ya kajeno, e e reng:

"Galaletsang MORENA! Gonne go pila go leletsa Modimo wa rona, ee, go monate; sefela sa pako se tshwanetse. MORENA o aga Jerušalema, o phutha balelekwi ba Iseraele. O fodisa ba ba dipelo di phatlogileng, o fapa dintho tsa bona. O tlhomamisa palo ya dinaledi, tsotlhe o di taya

maina. Morena wa rona o mogolo, o thata e kgolo; tthaloganyo ya gagwe ga e ka ke ya lekanngwa. Morena o kakatlolola ba ba pelonolo; mme baikepi bona o ba digela fa fatshe. Tlhabelang MORENA sefela sa tebogo; opelelang Modimo wa rona ka harepa!” Amen.

Thapelo ya Morena: Rara wa rona yo o mo legodimong ...

10. Sefela sa 19 - 19/ 20

A kagiso ya Modimo e e fetang tthaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke P. C. Weber, ka ngwaga wa 2007.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.